

www.BibleForChildren.org


Mateu 1



Waaphiyeraya myeeri siita, Nluku ahonveleeliha ncelo
Kapiriyeli wiira arwee isittatti yo' Kalileya, yeehaninya
Nasaree, wiira amphwanye mwali oopakaneliya ni
nlopwana eehaninya Yusufu aari o nloko na Taviti.
Mwali uyo eehaninya Mariya.



Vano ncelo ule aheera: Mariya, uhoove!
Kontha uhovahiya nnema wamiithoni
wa Nluku. Maana unaahala urupala
irukulu n'unnyara mwana, nohalaa
unvaha ncina na Yesu. Yooyo
nohala ukhala muulupale ni
nokowiihaninya Mwana o
wirimu, ni Mwanene Nluku
naahala unvaha ihice yo'mwene wa
Taviti, athumwane. Ni naahala
ulamula woohimala nloko na Yakopi
ni umwene awe khummala tho.



Vano Mariya ahonkoha ncelo ule, eeraka:
Wanhala ukhala cani? Mi, kakhaleru
akinatoko unthukumanana nlopwana.

Vano ncelo ule ahomwaakhula
eeraka: Unawukhuruwela Nnepa
Nttakattifu, ikuru ca Nluku o
wirimu ni irunku awe
inawuukhunela.

Ciicammo
Nttakattifu
nohalaa unnyara,
nohala wiihaninya

Mwana a Nluku.



Yaayo mahuku ayo, Mariya ahokhuma wowaakuvyaca
wene ni ahorwaa nttetthe wo'myaakoni,
uryaya isittatti imoca yo'Yuteya, ahorwaa
uwannyawe Sakariya ni
ahonsalameeha Isapeli.
Vano ule wiiwa wawe
isalama ya Mariya,
mwana ule
ahowunawuna
mmirimani mwa
Isapeli ni Isapeli
wahoncara Nnepa
Nttakattifu.



Vaavale ahokhuwela venci eeraka:
Uhoreriya we wariyari wa athiyana
othene ni horeriya mwana
nohalaa unnyara uyo!



Uyaryaa wa Yesu Kristu weeranele coo:
Mariya anumwane Yesu
napakaneliyene ni Yusufu,
ahinaya waathukmanana,
ahorupala irukulu mo'kuru
co Nnepa Nttakattifu.
Nanso Yusufu
mayopakanela,
ukhala wiira aari
ntthu nasariya ni
khaatthuna unvenwihaca,
aholakela unhiya
mmwiitihoni.



Nanso oopuwelacaka manhiyero, ahophwanyinya munttorani ni ncelo a Apwiya amwiirelaka: Yusufu, mwana a Taviti, uhoove unkusa Mariya ukhala mwaaraa, kontha irukulu irinawe iyo iri yo Nnepa Nttakattifu. Uyo naahala unnyara mwana ni ummonvaha ncina na Yesu, kontha naahala woopola atthu awe ntampini mwaya.



Yusufu wunwa wawe waarupawe, ahopanka toko caalamuleliyawe ni ncelo a Apwiya, ni ahomwaakhelela Mariya ukhala amwaarawe. Nanso khaanthukumananne mpaka waannyanryawe mwana, ni ahonvaha ncina na Yesu.



Yaayo mahuku ayo, Sesari Akusitu ahovaha nlamulo no
wantikhiya ntthitto atthu othene o mwiilaponi mwawe.
Vano atthu othene
yaanarwaa wiicantikiha,
khula ntthu
aarwa usittatti
wawe.



Ciicammo Yusufu ahokhuma uKalileya isittatti
yo' Nasaree, arwaaka nttette wo' Yuteya, isittatti ya
Taviti ineehaninya
Petelehemu, kontha aari o
nihimo ni nloko na
Taviti, wiira
eecantikihe



wamoca ni Mariya amwaarawe, anari ni irukulu.



Vano anaryene wonwo,
yahophiyera mahuku
awe ooyara.



Ahonnyara mwana mwanlopwana ontthaara, ni
ahonkhuneelaca ni ikuwo, ahomwaatalela nlelyoni
mo'nama, kontha khayaarina
nipuro noomaka.



Yahaawo ahakheli yaakhalakhalaca mmathalani yoole
nttette ule, yaarupelelaca inama caya. Vaavale
ahaakhumelela ncelo a Apwiya, ni
waarya wa Apwiya
wahaarukurerya, ni
yahoovaca
venci.



Vano ncelo ule aheerelaca coo: Nhoove! Kontha
kinoowiiherani nhupi woorera ni
wootteeliha nrima, unhala
ukhala wa
atthu
othene.



Ilelo, isittatti ya Taviti, hoyarya moopoli ri Apwiya
Kristu. Vano, nthoonyero unhala ukhala ph'ula:

Nnaamphwanya mwana
nakhuneelaciye ni ikuwo
ni neesiye
nlelyoni
mo'nama.



Wowaakuvyaca wene wahowa mphwinko wa anakhotto
o wirimu wamoca ni ncelo anttottopelaka
Nluku yiiraka: Attittimihiye Nluku
Ooculu, isalama vathi va
ikhale na



atthu avahiye
iraati ya Nluku!



Vano ancelo ale ukhuma waya arwaaka
wirimu, ahakheli ale yaheerelana
ayaayoru: Nrwee mpaka uPetelehemu,
noone yeeyo itthu ikhumelenle iyo,
Apwiya inicuwelihilyaya.



Yahorwaa wowaakuvyaca wene, ni yahomphwanya
Mariya, Yusufu ni mwan'ole naataleliye nlelyoni
mo'nama. Vano umoona waya yahottonkaca moolumo
yaahimyaceriyaya amwaacaka mwan'ole.



Yesu ayaryele
uPetelehemu
yo'Yuteya, Heroti
nari mwene, yahowa
uYerusalemu
acuwelaci

o'tthoottwa, yaakhuma mphantte
unkhuma ncuwa, ni yaanakohakoha
yiiraka: Ri vayi mwene a ayuta
yaryele naanano uyo?



Kontha nihowoona
itthoottwa awe
ikhumelelaka
unkhuma ncuwa, ni
naaweenle unlapela.



Toko commo, Heroti
aheehana mmwiitihoni
acuwelaci ni ahaakohakoha
wiira acuwele ukatini
woonnyaya itthoottwa eyo.
Vano aarumaka
uPetelehemu, aheerela:
Murwee mweewehe ratta
ratta ihaali ya mwan'oyo, ni
mwamphwanya,
mwaakihimerye
wiira nimi
kirwee
kanlapele.



Waamwiiwilyaya mwene ule, yahorwaaca. Vano
yahoona wiira itthoottwa yoonnyaya mphantte
unkhuma ncuwa yaari uhoolo
waya, mpaka weemenlyaya
nipuro naaryawe mwana.
Waakenlyaya mpaani,
yahomoonna
mwan'oyo ni
Mariya anumwane.



Yahokhoroma n'unlapela, ni atthukulaka mirupa caya,
yahokumiha mihakhu n'untthuva; nnyo caari, iwooru,
lumpani ni miira. Vano
anahimeriyene munttorani
wiira ahihokoleele wa Heroti,
yahovira nttala nkina arwaaka
uwannyaya.



Vano waakhumilyaya
acuwelaci, ahowa ncelo a
Apwiya wa Yusufu
munttorani ni ahomwiirela:
Wiitthenkemanihe, unkuse
mwan'oyo na anumwane,
utthawele wIciipitu ni
wakhale wonwo mpaka
mi wuhimerya, maana
Heroti

naahala umwaavya
mwan'oyo wiira amwiive.





Witthenkemanihaca wawe,
ahonkusa uhiyu mwana ule
na anumwane ni ahorwaa
wIciipitu, ni ahokhala wonwo
mpaka wakhwilyawe Heroti,
wiira itthariheleliye
yaahiminye na Apwiya
ni nnapiyu eeraka:
Ukhuma wIciipitu





kihomwiihana mwanaka.



Vano Heroti, wona wawe wiira
ahothepiya na acuwelaci
yaakhuma unkhuma ncuwa,
ahorusiya venci mpaka ulamula
wiira yiivakaciye asaana
asilopwana othene yaariwo
uPetelehemu ni ilapo . . .



. . . cowaattamanana wonwo,
ukhuma myakha miili urwaaka
vathi, toko waaryaya ukati
waakohakohilyawe acuwelaci.



Vaavale nakhwilene Heroti,
ahowa ncelo a Apwiya wa
Yusufu munttorani wIciipitu,
ni ahomwiirela:


Witthenkemanihe, unkuse
mwan'oyo na anumwane
ni urwee ilapo
yo' Sirayeli, maana
ahokhwaca ale



yaaphavela umwiiva
mwan'oyo.



Vaavale, weewilyawe Yusufu wiira Arkelau phinlamula
uYuteya, nipuro na
Heroti, athumwane,
ahoova urwaa wonwo.
Ahimeriyaka ni
Nluku



munttorani, ahorwaa
nttette wo'Kalileya,
ukhala isittatti yo'Nasaree, wiira
itthariheleliye yowantikhiya ni minapiyu yiraka:
Uyo nohala wiihaninya nnasaree.



Kontha Nluku hofenta ittuninya
mpaka wanvaherenryawe mwanawe
mmoca yooyo, wiira ule nohala
unkupali hirimele nanso
aphwanye ukumi
woohimala.



Aroma 3:23

Kontha othene ahokosa ni ari uttayi ni waarya wa Nluku,

Aroma 6:23

Kontha ncahara wo'tampi uri ukhwa, nanso ivahiya ya Nluku uri ukumi woohimala, mwa Apwiy'ehu Yesu Kristu.

Annaheperi 9:27

Toko commo, caalikeleliyawe ntthu ukhwa ikwaha imoca paahi, wahoolo puhukhumwinyaka,



Annefesu 2:8,9

Kontha nyu moopoliye wo nnema, mwa nlattu wookupali winyu, ni khannakhala phi nyu nkhumanne, iyo iri ivahiya ya Nluku. Khawanakhala wo miteko cinyu, wiira hikhale nohala wiittotopa.

Aroma 10:9,10

Walaphululaka ni malaku aa wiira Yesu ph' Apwiya, ni wanrimani waa ukupaliki wiira Nluku homunweleliha mwa atthu ookhwa, unawoopwa. Maana, ntthu nokupali ni nrima awe naaphwanya isariya, ni ntthu nolaphulula ni malaku awe nawoopwa.



Yohani 3:16,17

Kontha Nluku hofenta ittuninya mpaka wanvaherenryawe mwanawe mmoca yooyo, wiira ule nohala unkupali hirimele nanso aphwanye ukumi woohimala. Maana Nluku honruma mwanawe wattuniyani, kahi wiira ahukhumule ittuninya, nanso wiira ittuninya yoopoliye ni uyo.

1 Yohani 5:11-13

Usaahiti uyo ph'ula, wiira Nluku honivaha ukumi woohimala, ni ula ukumi ula uri mwa Mwanawe. Ntthu rina Mwana a Nluku haana ukumi; ule hirina Mwana a Nluku kharina ukumi. Nnya citthu nnya kiwantikhenleni wiira ncuwele wiira nhaana ukumi woohimala ni wiira nkupali ncina na Mwana a Nluku.



Mateu 1-2; Luka 1-2

Storyline by: Edward D. Hughes

Illustrated by: M. Maillot
and Alastair Paterson

Adapted by: E. Frischbutter, Sarah S.

Makhuwa-Meetto Bible (mgh) © 2021, Wycliffe Bible
Translators, Inc. All rights reserved.

<https://live.bible.is/bible/MGHPBT/MAT/1>

©2024 Bible for Children, Inc.

www.M1914.org

www.bibleforchildren.org

